



partii naleraq

Nuuk 8. oktober 2018
UKA2018/195-196
Pele Broberg Partii Naleraq

Uunga siunnersuut: Soraarnerussutisiaqalernissamut aningaasaatit ilaannit pissarsiat akileraaruserneqartarnerat pillugu Inatsisartut inatsisaata allanngortinneqarneranik Inatsisartut inatsisaat nr. xx, xx. xxx 2018-imeersoq. (Inatsisip atuuffiata ilaneqarnera)

Uunga siunnersuut: Pigisanit pissarsiat ilaasa akileraaruserneqartarnerat pil-lugu Inatsisartut Inatsisaata allanngortinneqarneranik Inatsisartut inatsisaat nr. xx, xx. xxx 2018-imeersoq. (Akileraartussaasut ilaneqarnerat aamma inatsisip atuuffianik millisitsineq)
(Aningaasaqarnermut Naalakkersuisoq)

Siullermeernera

Inatsisinut allannguutitut siunnersuutit marluk Partii Naleqqamiit imatut oqaaseqarfigissavagut. Inatsisit suulluunniit atuutilernerneranni takorluugaasimannngitsunik kinguneqaraangata, allannguutissanik siunnersuutissanik saqqummiussineq takornartaanngilaq.

Ukiaanerani inatsisissatut siunnersuutit arlallit aamma isummersorfigissavagut, qularnanngitsumillu akuerineqassappata kingusinnerusukkut allannguutissaannik siunnersuuteqarnissaq takorloorneqarsinnaalluni, siunertaminnik uniuippata.

Taamaattorli uku inatsisinut allannguutissatut siunnersuutit, inatsisit suliarilluugaannginnerannik tunngaveqarnerat Partii Naleqqamiit isornartorsiorparput.

Inatsisit siunnersuutigineqarmata 2017-imi, tusarniaaneq aasaanerani sulinnngiffeqarnerup nalaani, ulluni 14-ini pisimavoq.

Susassaqartunik tamanik tamanna uparuarneqarpoq. Inatsisit inuiaqatigiinnut aammalu suliffeqarfinnut kingunissaanut qulaajaanissamut piffissaq sivikippallaarneralugu. Inatsisit akilerartarnermut tunngassutillit allaat kukkunersiortartut paasiuminaatsillugit uparuartorpaat, taamaattorli ataatsimiititaliamut susassaqartumut ingerlateqqinneqariarlutik, kingorna akuerineqarput.

Partii Naleqqamiit assersuutigalugu taarusupparput manna mittarfissuarnut inatsisissamut siunnersuut suliarilluugaanngitsoq, naalagaaffeqatigiinnermut kalluaasussa qularnanngitsumillu nunatta sillimaniarneranut sunniuteqartussa, inatsisartuni ilaasortaasut atsiorderisigut pituttorniarlugit kingunissaat qulaajarnagit, sulineq qulaaniit aqullugu ingerlasoq.

Inuiaqatigiit akornanni oqaluuserineqaqisut mittarfissuarnut pilersaarutit 2015-imi aaliangiussat qinigaavimmi pilersinnissaannut siunnerfiusimasut, naggammullu maaniinnaq qinersinermik

qinguneqaqataasut, taamaammallu maanna inatsisartunut pituttuinngitsut, ammasumik oqallisigineqarsinnaasimangillat. Naak maanna tunngaviumik aallaavik ”basisscenarie” atorunnaartoq, tassami akissaqartinnginnatsigugooq Kangerlussuup aserfatsaalineranut aaqqiissuteqarnissamut, taamaammallu akikinnerusoq ukiut 25-it ingerlanerat isigalugu Nuuk Ilulissallu mittarfissuulerutsigit.

Maannali Danmark aamma USA akileerusulersimapput Arktisk militariserings strategi, tassa sakkutuulersorsinnaaneq, siunertaralugu. Taamaammat tunngaviumik imminut akilersinnaajunnaarpoq mittarfissuit attatiinnassallugit.

Partii Naleqqamiit assersuutitut atugatta akerliani uani inatsisinut allannguutissanut siunnersuutit nunatsinniittut bankit ikiorserniarlugit, aningaasanik sipaarneruniassammata systemi tulluutinngitsup eqqunnerata kingunerisaanik, ajornanngissimaqaaq allannguutissanik ujartuineq.

Inatsisit tulluutinngitsut isornartorsiulaaginnariarlugit ataatsimiititaliani akuersaaginnarneqartarpata maannatut ajornanngitsigisumik neriuppunga aamma allannguutissanik siunnersuutissat akuerineqartarnissaat. Aamma bankerujussuunngikkaluarlutik iluaquserussat.

Inatsisit atorunnaarsinneqarnianngippata, soorlu Demokraatit 2017-imi innersuukkaluaraat siunnersuutip itigartinneqarnissaa, taava una allannguutissaq ataatsimiititaliamut susassaqartumut sukumiinerusumik suliarineqarnissaanut Partii Naleqqamiit innersuupparput.